

四庫全書

子部

欽定四庫全書

子部

印典
目錄
卷二

詳校官中書臣賈鏊

貢外郎臣牛稔文覆勘

覆校官編修臣翁方綱

校對官中書臣吳俊

謄錄貢生臣宋大樽

欽定四庫全書

子部八

印典目錄

藝術類三

篆刻之屬

卷一

原始

制度上

卷二

制度下

卷三

賚予

流傳

卷四

故事

卷五

綜紀

集說

雜錄

卷六

評論

鐫製

卷七

器用

卷八

詩文

臣等謹案印典八卷

國朝朱象賢撰象賢號清溪吳縣人是編採錄
印璽故實及諸家論說分原始制度賚予流
傳故事綜紀集說雜錄評論鑄製器用詩文
十二類後有康熙壬寅白長庚跋稱所引宋

王基梅菴雜記蝸廬筆記葉氏游藝雜述元
宋无攷古紀略四書皆得之槁李曹氏鈔本
為諸家所未見然他所援据率乏秘籍所分
諸類亦頗淆雜如故事與綜紀二門所載多
相出入又往往字句偶涉即為闌入如周顓
傳稱取金印如斗大繫肘後辛替否傳稱金
銀不供其印皆因他事口談王融傳稱穰侯
印詎便可解世說新語稱石勒使人讀漢書

聞立六國後刻印將授亦偶然追述舊典俱
非印璽故事未免濫收且雜採舊文漫無考
辨吾衍學古編云三代無印又辨淮南子載
子貢印事之妄而賚子門內乃以此事為首
尤自相矛盾然採摭既富亦足以資參考之
助且古人未有集印事為書者姑仿文房四
譜之例存之以備一家象賢自稱朱長文裔
故是書初刻附墨池編後以行今以時代既

殊所載各異仍分著於錄使各從其類焉乾隆四十二年三月恭校上

總纂官臣紀昀 臣陸錫熊 臣孫士毅

總校官 臣陸費墀

印典序

古人銘物紀事往往託之金石是以鼎匱碑碣之屬博古家皆視同景星卿雲而寶愛之若官私印章與鼎匱碑碣同出古人之手好篆刻者偶或留心一二其餘俱置不講何歟予家貧識陋不能一見湯盤孔鼎而秦漢印章猶有流傳得窺其妙故每涉獵羣書采錄類聚編成八卷名曰印典好古君子欲知古印淵源不外乎此矣若夫嫵媚纖巧古無是體或非大家所尚予則不暇

及也清溪朱象賢識於大梁使院之含翠亭

欽定四庫全書

印典卷一

長洲朱象賢撰

原始

古印良可重矣可以攷前朝之官制窺古字
之精微豈如珍竒玩好而涉喪志之譏哉但
去古久遠幾昧從來若不粵稽往昔誰復知
其根本首錄原始以著肇端

天王符璽

春秋運斗樞黃帝時黃龍負圖中有璽章丈曰天王符璽

赤帝符璽

春秋合誠圖堯坐舟中與太尉舜臨觀鳳皇負圖授堯圖以赤玉為匣長三尺八寸厚三寸黃玉檢白玉繩封兩端其章曰天赤帝符璽

天王玉璽

春秋運斗樞黃龍五采負圖而出舜前白玉檢黃金押

黃金繩芝為封泥兩端有文曰天王有玉璽五字博袤
三寸

龜領印

王子年拾遺記禹治水黃龍曳尾於前元龜負青泥於
後龜領下有印文皆古文作九州山水之字禹所穿鑿
之處皆使青泥封記其所使元龜印其上後世印章皆
肇此也

璽節

周禮掌節貨賄用璽節注璽節如今之印章

烏巢玉璽

拾遺記武王滅紂樵夫牧豎探烏巢得赤玉璽文曰水德方滅火祚方盛字皆大篆

傳國璽

錄異記歲星之精墜於荆山化而為玉側而視之色碧正而視之色白卞和得之獻楚王後入趙獻秦始皇一統琢為受命璽李斯小篆其文歷世傳之為傳國璽

印璽檢姦

後漢祭祀志自五帝始有書契至三王俗化彫文詐偽
漸興始有印璽以檢姦萌

制度上

今之沿襲始自古人不師先世成規焉證後
人之失然而時代推遷變更不一是非詳攷
鮮知取法也茲集歷代分別尊卑質式彙輯
制度二卷少備考據

制六璽

馬端臨云秦以印稱璽以玉不通臣下用制乘輿六璽
曰皇帝行璽皇帝之璽皇帝信璽天子行璽天子之璽
天子信璽又始皇得藍田白玉為璽螭虎鈕文曰受天
之命皇帝壽昌

方寸璽

漢舊儀秦已前民皆以金銀銅犀象為方寸璽各服所
好漢一作秦以來天子獨稱璽又以玉羣臣莫敢用也

紫泥封璽

漢書璽皆玉螭虎鈕凡六其文亦殊曰皇帝行璽皇帝之璽皇帝信璽天子行璽天子之璽天子信璽外有大藍田玉璽曰受天之命皇帝壽昌皆以武都紫泥封之盛以青囊白素裏兩端無縫尺一櫃中約署舊儀云皇帝綬黃地赤采不佩璽璽以金銀滕組侍中組負以從

皇后璽

漢書皇后璽文曰皇后之璽金螭虎鈕舊儀云皇后婕

好乘輦餘皆以茵四人輿以行皇后玉璽文與帝同
後漢靈帝冊宋貴人為后御章德殿太尉襲使持節奉
璽紱宗正讀冊畢后拜稱臣任位太尉授璽紱中常侍
長秋太僕高鄉侯覽長跪受璽紱奏於殿前女使授婕
妤長跪受以授昭儀受長跪以帶后后秩比國王即位
威儀赤紱玉璽也又蔡邕獨斷云皇后赤綬玉璽貴人
綬音戈金印按綬綬色似綠綬文也

太后璽

輿服志太皇太后皇太子及妃璽皆以金為之藏而不
用太后封令書以宮官印皇后以內侍省印皇太子以
左春坊印妃以內坊印文獻通考皇太子黃金印龜鈕
文曰章

璽章印

漢官儀諸侯王黃金璽橐駝鈕文曰璽列侯黃金印龜
鈕文曰某侯之章丞相

高帝十一年
更名相國

太尉與三公前後

左右將軍黃金印龜鈕文曰章中二千石銀印龜鈕文

曰章千石六百石四百至二百石以上皆銅印鼻鈕文
曰印文獻通考御史大夫銀印青綬凡吏秩比二千石
以上皆銀印青綬光祿大夫無秩比六百石以上皆銅
印墨綬大夫博士御史謁者郎無秩僕射御史治書尚
符璽者有印綬比二百石以上皆銅印黃綬

印章五字

文獻通考漢武帝太初元年改正朔數用五紀注印文
若丞相曰丞相之印章諸卿及守相印文不足五字者

以之字足之

官印五分

漢官儀卿秩中二千石孝武皇帝元狩二年令通官印
方寸大小官印五分王公侯金二千石銀印龜鈕

尚書令印

漢官儀尚書令秦官也漢初並用士人銅印墨綬秩二
千石

佩雙印

後漢輿服志佩雙印乘輿諸侯王公列侯以白玉中二千石至四百石皆以黑犀三百石以至私學弟子皆以象牙上合絲乘輿以縢貫白珠赤罽縢諸侯王以下以

繇赤絲縢縢繇各如其印質

或云雙印二桃也佩之以自戒也予考漢書載雙印

刻書曰正月剛卯既央靈爰四方青赤白黃四色是常帝令祝融以教夔龍庶疫剛痺莫我敢當又曰疾日嚴卯帝令夔化慎爾周伏伏茲靈爰既正既直既觚既方庶疫剛痺莫我敢當共六十六字則雙印即剛卯而非印用之印章也

堯贈印璽

後漢禮儀志諸侯王列侯薨皆令贈印璽玉柙銀鏤文
貴人長公主銅鏤

復設璽印

文獻通考建武元年復設諸侯王金璽綬綬公侯金印
紫綬九卿執金吾河南尹大長秋將作大匠度遼諸將
軍郡太守國傅相校尉中郎將諸郡都尉諸國行相中
尉內史中護軍司直秩皆二千石以上皆銀印青綬中
外官尚書令御史中丞治書侍御史公將軍長史中二

千石丞正平諸司馬宮中王家僕雒陽令秩皆千石尚書中謁者黃門冗從四僕射都郡監中外諸郡官令都侯司農部丞郡國長吏丞侯司馬千人家令侍僕秩皆六百石雒陽市長主家長秩皆四百石以上皆銅印墨綬諸曹長揖擢丞秩三百石諸秩千石者其丞尉皆秩四百石秩六百石者丞尉三百石四百石者其丞尉秩二百石縣國丞尉亦如之縣國三百石長丞尉亦二百石明堂靈臺丞諸陵校長秩二百石丞尉校長以上皆

銅印黃綬縣國守宮令相或千石或六百石長或四百石或三百石長相皆以銅印黃綬而有秩者侍中中常侍光祿大夫秩皆二千石太中大夫秩皆比二千石尚書諫議大夫侍御史博士皆六百石議郎中謁者秩皆比六百石小黃門侍郎中黃門秩皆比四百石郎中秩皆三百石太子舍人秩二百石

與服制通

鐵印戾符

漢官解詁衛尉主宮闕之內凡居宮中者皆施籍於掖

門按其姓名若有醫巫僦人當入者本官長吏為之封
啟傳審其印信然後內之人未定又有籍皆復有符以
當所屬官兩字為鐵印亦太卿灸符當出入者按籍畢
復齒符識其物色乃引內之也

封禪璽

祭祀志檢用金縷五周以水銀和金以為泥玉璽一方
寸二分一枚方五分

女官佩印

王莽篡位後徵天下淑女杜陵氏女為皇后成同牢禮
於西堂備和嬪美御其和人三位視公嬪人九視卿美
人二十七視大夫御人八十一視元士凡百二十人皆

佩印紱執弓韣

音請

魏貴人印

魏志武帝內誡令曰宮人位為貴人金印藍綬女人爵
位之極

印以官名

魏武設官令魏諸官印各以官為名印如漢法斷二千石者章

官級印質

杜氏通典魏黃初三年初制封王之庶子為卿公嗣王庶子為鄉侯公之庶子為亭伯其後定制凡國王公侯伯子男六等次縣次鄉次亭侯次關內侯又置名號侯爵十八級關中侯爵十七級皆金印紫綬關外侯爵十六級銅印龜鈕墨綬五大夫十五級銅印環鈕亦墨綬

自關內侯皆不食租虛封爵自魏始

晉太子璽

文獻通考晉皇太子金璽龜鈕朱黃綬四采赤黃縹紺

女官章印

又貴人夫人貴嬪是為三夫人皆金章紫綬文曰貴人
夫人貴嬪之章淑妃淑媛淑儀修華修容修儀婕妤容
華充華是為九嬪銀印青綬

王璽

晉百官志王古號也夏殷周稱王金璽龜鈕細纁朱綬
公車司馬印

晉百官表注公車司馬令一人周官也銅印墨綬絳服
官品第七

公侯印

晉輿服志郡公縣公縣侯大夫夫人銀印青綬

太監銀章

晉令有通德殿太監尚衣尚食太監並銀章艾綬

宋諸官印

文獻通考宋皇太子金璽龜鈕朱綬諸王金璽龜鈕纁
朱綬郡公金章紫綬太宰太傅太保丞相司徒司空金
章紫綬相國綠綬綬大司馬大將軍太尉凡將軍位從
公者金章紫綬郡諸侯金章青朱綬驃騎車騎以下諸
將軍並金章紫綬諸王嗣子金印紫綬郡公侯嗣子銀
印青綬尚書令僕射中書令監秘書監銅印墨綬光祿
大夫太子詹事左右衛以下諸將軍監軍銀章青綬諸

校尉中郎將銀印青綬縣鄉亭侯金印紫綬鷹揚伏波
以下諸將軍銀章青綬諸都尉校尉中尉銀印青綬州
郡史銅印墨綬御史中丞都水使者銀印墨綬諸軍司
馬銀章青綬匈奴護羌諸校尉銅印青綬尚書左右丞
秘書丞銅印黃綬其下又有假青綬假墨綬

太子妃璽

沈約宋書皇太子妃金璽龜鈕纁朱綬

齊璽印制

文獻通考齊乘輿制六璽以金為之並依秦漢之制皇
太子諸王金璽皆龜紐纁朱綬赤黃縹紺色亦同公侯
五等金章相國綠綬綬三采綠紫紺郡公朱侯伯青子
男素朱皆三采公嗣子紫侯嗣子青鄉亭侯關中關內
侯紫綬白二采郡太守內史四品五品將軍皆銀章青
綬尚書令僕射至諸州刺史皆銅印尚書令僕射中書
監秘書監皆墨綬丞皆黃綬其乘輿綬黃赤縹紺四采

梁印

文獻通考梁乘輿印璽及皇太子諸王五等國封並略
如齊制鄉亭關內關中及各號侯諸王嗣子金印龜紐
紫綬關外侯銀印珪紐青綬大司馬大將軍太尉諸位
從公者金章龜紐紫綬尚書令僕射尚書中書監令祕
書監銅印墨綬左右光祿大夫加金章紫綬同其位但
加金紫者謂之金紫光祿但加銀青者謂之銀青光祿
太僕廷尉以下諸卿丹陽尹銀章龜紐青綬諸將軍金章
紫綬中郎將則青綬郡國太守相內史銀章龜紐青綬

諸縣署令秩千石者州郡大中正郡中正銅印環鈕墨綬公府令史亦同諸縣尉銅印環鈕單衣黃綬

陳璽章印

文獻通考陳永定元年武帝所定乘輿服御皆採梁舊制以天下初定務惟節儉至天嘉中乃一依梁天監舊事比齊制天子六璽並依舊式皇帝行璽封常行詔勅用之皇帝之璽賜諸王書用之皇帝信璽下銅獸符發諸州鎮兵下竹使符拜代召諸刺史用之並白玉為之

方一寸二分螭獸鈕天子行璽冊拜外國則用之天子之璽賜諸外國書則用之天子信璽發兵外國若徵召外國及有事鬼神用之並黃金為之方一寸二分螭獸鈕又有傳國璽白玉為之方四寸螭獸鈕上交螭螭隱起鳥篆書文曰受天之命皇帝壽昌凡八字在璽外唯封禪以封石函又有督攝萬機印一鈕以木為之長尺二寸廣二寸五分背上為鼻鈕鈕長九寸厚一寸廣七寸腹下隱起篆文督攝萬機四字此印常在內唯以印

籍縫用則左戶部郎中度支尚書奏取印訖轉納皇太子璽黃金為之方一寸龜鈕文曰皇太子璽宮中大事用璽小事用門下典書坊印諸侯印綬二品以上並金章紫綬三品銀章青綬

三品以上凡是五省官及中侍中省官皆為印而不為章也

四品得印者銀印青綬五品六品得印者銅印墨綬

四品

以下凡是開國子男及五等散品名號侯皆為銀章不為印也

七品八品九品得印者

銅印黃綬金銀章印及銅印並方一寸皆龜鈕四方諸藩國王之章上藩用金下藩用銀並方寸龜鈕佐官唯

公府長史尚書二丞給印綬六品以下九品以上唯當
曹為官長者給印餘自非長官雖位尊並不給

章印異鈕

陳制金章為龜鈕豹鈕貔鈕銀章為龜鈕熊鈕羆鈕羔
鈕鹿鈕銀印為珪鈕兔鈕銅印率環鈕

北齊后璽

北齊皇帝納后禮皇后服大嚴綉衣帶綬珮加幘女長
御引出升畫輪四望車女侍中負璽陪乘鹵簿如大駕

北周璽印

文獻通考後周皇帝八璽有神璽有傳國璽皆實而不
用皇帝負宸則置神璽於筵前之右置傳國璽於筵前
之左其六璽並因舊制皆白玉為之方一寸五分高一
寸螭獸鈕三公諸侯印皆方寸二分高八分龜鈕七命
以上銀四命以上銅皆龜鈕三命以上銅印鼻鈕其方
皆寸其高六分文曰某公官之印

隋璽

文獻通考隋神璽寶而不用受命璽封禪則用之餘六璽行用並依舊制

隋制皇后有金璽盤螭鈕文曰皇后之璽冬正大朝則并璜琮各以笥貯進於座隅

唐璽印

文獻通攷唐天子有傳國璽及八璽皆玉為之神璽以鎮中國藏而不用受命璽以封禪禮神皇帝行璽以報王公書皇帝之璽以勞王公皇帝信璽以召王公天子

行璽以報四夷書天子之璽以勞四夷天子信璽以召
兵四夷皆泥封大朝會則符璽郎進神璽受命璽於御
座行幸則合八璽為五舉函封從於黃鉞之內初太宗
刻受命元璽以白玉為螭首文曰皇天景命有德者昌
至武后改諸璽皆為寶中宗即位復為璽開元六年復
為寶天寶初改璽書為寶書十載改傳國寶為承天大
寶太皇太后皇太后皇后皇太子及妃璽皆金為之藏
而不用太皇太后皇太后封令書以宮官印皇后以內

侍省印皇太子以左春坊印妃以內坊印天子巡幸則京師東都留守給留守印諸司從行者給從行印

同文印

舊唐書玉牒玉策以受命寶印之納二玉置於璽中金泥璽際以天下同文之印封之

鑄印追兵

唐書肅宗在靈武鑄印追兵文曰六合大同之印

置諸官印

唐會要建中三年詔中書門下兩省各置印長慶三年
鑄御史臺行從印二出使印二

唐宗室李說請為監軍使王定遠別鑄印上許之監軍
有印自定遠始

唐文宗紀太和五年勅造諫院印一面以諫院之印為
文諫院舊無印各於本司取印每有疏人多知之故勅
置印

墨印

舊唐書左藏令掌邦國庫藏之事天下賦調納庫藏凡出給先勘木契然後錄其名數及請人姓名署印送監門乃聽出若外給者以墨印印之

奏准製寶

五代史晉天福三年中書門下奏准勅製皇帝受命寶以受天明命惟德允昌為文刻之

後周二寶

文獻通攷周廣順三年二月內司製國寶兩坐詔太常

其制度以聞有司奏按唐六典符璽郎掌天子八寶一
曰神寶二曰受命寶其神寶方六寸高四寸六分厚一
寸七分蟠龍鈕文與傳國寶同傳國寶秦始皇帝以玉
刻之方四寸鈕蟠五龍二寶歷傳以為神器又別有六
寶因文為名並白玉螭虎鈕歷代相傳亡則補之北朝
鑄之以金至則天朝以璽字涉嫌改為寶貞觀十六年
別製元璽一坐文曰皇天景命有德者昌白玉螭虎鈕
同光中製寶二坐文曰皇帝受命之寶晉天福四年製

寶一坐丈曰皇帝神寶其同光天福二寶內司製造不
見鈕象并尺寸制度勅令製寶二坐宜用白玉方六寸
螭虎鈕詔馮道書寶丈一以皇帝承天受命之寶為丈
一以皇帝神寶為丈

欽定四庫全書

印典卷二

長洲朱象賢撰

制度

下

宋寶制度

文獻通考宋制凡寶用玉篆文廣四寸九分厚一寸二分填以金盤龍鈕係暈錦大綬赤小綬連玉環玉撿高七寸廣二寸四分玉斗方二寸四分厚一寸二分皆飾以金裝裹以紅錦加紅羅泥金夾帊納於小盞盞以金

裝內設金牀暈錦褥飾以襯色玻璃碧鈿石珊瑚金精
石瑪瑙又盃三重皆裝以金覆以紅羅繡帔載以腰輿
及行馬並飾以金朝會陳於御前大禮即列於仗衛中

制用各寶

又宋太祖受禪傳周廣順中所造二寶太宗制承天受
命之寶真宗制恭膺天命之寶大中祥符中又別制恭
膺天命之寶天下同文之寶用於封禪昭受乾符之寶
以印密詞

禁中所用別有三印一曰天下合同之印中書奏覆狀
疏內銓歷任三代狀用之二曰御前之印樞密院宣命
及諸司奏狀用之三曰書詔之印翰林詔書勅別錄勅
榜用之皆鑄以金又以鍮石各鑄其一雍正三年並改
為寶別鑄以金舊者皆毀之

乾興元年作受命寶命叅知政事王曾書之遣內侍詣
少府監文思院視工作

仁宗明道元年禁中火寶冊悉焚其年九月改作寶及

冊命參知政事陳堯佐書受命寶宰相陳執中書欽崇
國祀之寶刻之以代真宗為昭受乾符之寶凡齋醮表
章用焉薛奎書尊號冊寶參知政事晏殊書皇太后尊
號冊寶二年成三司言用黃金二千七百兩為公寶法
物詔易以銀而塗黃金

皇祐五年九月作鎮國神寶時閱奉宸庫得良玉廣尺
厚半之上以其希世之寶不欲以為服玩因作鎮國神
寶命宰相龐籍篆而參知政事劉沆書其上寶成以進

召近臣宗室觀於延和殿太常禮院引唐六典次序曰
一神寶二受命寶冬至祠南郊大賀儀仗請以鎮國神
寶為前導自是遂為定式

英宗即位別製受命寶嘉祐八年將葬仁宗於永昭陵
翰林學士范鎮奏曰竊聞先朝受命寶及公寶物與平
生衣冠器用皆欲舉而葬之非所以稱大行皇帝恭儉
之意也其受命寶望陛下寶而用之且示有所傳付若
衣冠器玩則宜陳於陵寢及神御殿歲時展視以慰思

慕詔檢討官披繹典故及命兩制禮官議學士王珪等
議曰受命寶猶昔傳國璽也宜為天子傳器不當改作
古者藏先王衣服於廟寢至於平生器玩則世納於方
中亦不悉陳於陵寢謂宜從省約以稱先帝恭儉之實
已而別製受命寶珪等議格不用命叅知政事歐陽修
篆其文曰皇帝恭膺天命之寶元豐八年五月作受命
寶

文與

上同

徽宗崇寧五年有以玉印獻者方寸龜鈕工作精巧文

曰承天福延萬億永無極受寶記言有以古篆進者謂是也帝因次其文倣李斯蟲魚篆作寶文其方四寸有奇螭鈕方盤上圓下方名為鎮國寶

大觀元年制八寶時得玉工用元豐中玉琢天子皇帝六璽疊篆紹聖間得漢傳國璽無檢螭又不缺疑其一角缺者乃檢也有檢傳攷驗甚詳帝取其文而黜其璽因作受命寶其方四寸有奇琢以白玉篆以蟲魚帝自為之記鎮國受命二寶合天子皇帝六璽為八寶於是

下詔曰自昔皆有尚符璽官今雖隸門下後省遇親祠則臨時具員訖事復罷八寶既備宜重典司之職可令尚書省置官如古之制又詔永惟受命之符當有一代之制而尚循秦舊六璽之用度越百年之久或未大備自天申命地不受寶獲金玉於異域得妙工於編氓八寶既成復無前比殆天所授非人能為可以來年元日御大慶殿恭受八寶尚書省言請置符寶郎四員隸門下省二員以中人充掌寶於禁中按唐八寶車駕臨幸

則符寶郎奉寶以從大朝會則奉寶以進今鎮國寶受
命寶非常用之器欲臨幸則從六寶朝會則陳八寶內
符寶郎捧出以授外符寶郎外符寶郎從寶行行禁衛
之內朝則分進於御座之前鎮國寶受命寶不常用唯
封禪則用之皇帝之寶答鄰國書則用之皇帝行寶降
御札則用之皇帝信寶賜鄰國書及物則用之天子之
寶答外夷國書用之天子行寶封冊則用之天子信寶
舉大兵則用之應合用寶外符寶郎具奏請內符寶郎

御前請寶印訖付外符寶郎承受從之二年詔受命寶字之上添鎮國二字鎮國受命二寶寶而不用藏置內府人未知制作之因可宣付有司政和六年詔御寶自祖宗朝行用今百五十餘年角利篆暗幾不可驗恐無以示信天下舊有祖宗所藏御前金寶宜自冬祀大禮畢行用而降新舊二寶文付外照驗且以布告中外七年從于闐得大玉踰二尺色如截肪帝又制一寶赤螭鈕文曰範圍天地幽贊神明保合太和萬壽無疆凡十

六字篆以蟲魚制作之工幾於秦璽其寶九寸檢亦如
之號曰定命寶合前八寶為九其後詔以九寶為稱以
定命寶為首應行導排設去處定命與受命天子寶在
左鎮國寶與皇帝寶在右又詔得寶玉於異域受定命
於神霄合乾元用九之數以明年元日受之凡兩受寶
皆赦天下帝曰八寶者國之神器也至定命寶乃我所
自制云

紹興元年製受命中興寶宣示輔臣

比定命寶
大半分

十六年

郊祀始陳寶如承平之儀凡中興御府所藏玉寶十有

一金寶三八寶皆高宗作一鎮國神寶文曰承天福延

萬億永無疆二受命寶文曰受命於天既壽永昌三曰

天子之寶四曰天子信寶五曰天子行寶六曰皇帝之

寶七曰皇帝信寶八曰皇帝行寶

八寶印用已見前

大宋受命

之寶

太祖作

定命寶

文十六字徽宗作并八寶為九寶

太宗受命中興之

寶金寶三

皆建炎二年秋作

一皇帝欽崇國祀之寶

印香合詞表

二

天下合同之寶

印中書門下省文字

三書詔之寶

印詔書

皇后寶

宋紀景祐元年立后曹氏命禮院詳定儀注皇后玉冊如太子制珉簡寶用金方一寸五分高一寸文曰皇后之寶盤螭鈕服以褱衣大帶玉珮雙綬

文獻通考紹興十三年四月行皇后冊禮冊用珉玉五十簡寶用玉方一寸有半盤螭鈕文曰皇后之寶隆興以後悉金是制

太后玉寶

文獻通考哲宗元祐元年詔天聖中章獻明肅皇后用玉寶方四寸九分厚一寸二分龍鈕今太皇太后權問處分軍國事宜依章獻皇后故事從之又詔太皇太后玉寶以太皇太后之寶為丈皇太后金寶以皇太后寶為丈皇太妃金寶以皇太妃寶為丈

太子金寶

宋史至道中門下省言按開元禮皇太子寶以黃金為之方一寸隋志皇太子寶龜鈕文曰皇太子寶朱組大

綬請如舊制製造從之

文獻通考乾道元年禮官討論皇太子冊寶之制按會要冊用珉玉簡六十前後四枚寶以黃金為之文曰皇

太子寶係龜鈕

舊制方二寸

貴妃金印

宋史慶歷八年制美人張氏為貴妃所司擇日備禮冊命學士宋祁就院寫告用官告院印封進妃擲告於地不受十二月發冊設次位命官持節授冊印內外命婦

稱賀及入謝略如冊后儀冊用竹簡二十四版長尺一
濶寸天下樂錦裝標金印方寸文曰貴妃之印龜鈕紫
綬

尊號寶

文獻通考累朝每上尊號有司製玉寶以尊號為文
紹興二十二年孝宗受禪詔恭上太上皇帝尊號曰光
堯聖壽太上皇帝禮官討論冊寶之制冊用珉玉寶用
玉篆文廣四寸九分厚二寸二分以皇祐黍尺為度填

以金盤龍鈕係以暈錦大綬赤小綬連玉環玉檢納於小盞盞以金飾之乾道七年淳熙二年十二年加上尊號及紹熙元年上至尊壽皇帝聖尊號慶元二年上聖安壽仁太上皇帝尊號冊寶悉同此制又上壽聖太上皇后尊號冊寶如慈寧之制紹熙初上壽聖皇太后壽成皇后尊號金寶皆六字文曰壽聖皇太后寶壽成皇后之寶廣四寸九分厚一寸二分填以金盤龍鈕四年加上壽聖隆慈備福皇太后尊號金寶以十字為文慶

元二年十月上壽聖隆慈備福光佑太皇太后壽成慈
惠皇太后壽仁太上皇后冊寶其制並同嘉泰時加上
壽成慈惠太皇太后尊號冊寶亦如之紹興七年命文
思院用玉製顯肅皇后寶二顆禮官言國朝諸后謚寶
曾垂簾聽政者用玉餘止用金遂詔以金造

御書印

史祥符二年鑄龍圖閣印文曰龍圖閣御書記天禧四
年編御集朱允中等言御製書印三請用金鑄從之

諸司銅印

文獻通考宋因唐制諸司皆用銅印諸王及中書門下
印方二寸一分樞密宣徽三司尚書省諸司印方二寸
惟尚書省印不塗金餘皆塗金節度使印方一寸九分
塗金餘印並方一寸八分惟觀察使塗金諸王節度使
州府軍監縣印皆有銅牌刻文云牌出印入印入牌出
或本局無印者皆給奉使印景德四年別鑄兩京奉使
印又有朱記以給京城及外處職司及諸軍校等其制

長一寸七分廣一寸六分士庶及寺觀亦有私記大中祥符五年詔禁私鑄止得雕木為文大方寸

鑄三面印

文獻通考景祐三年篆文官王文盛言於少府監曰在京糧料院印多偽倣之以摹券歷者謂宜鑄三面圓其制而面濶二寸五分於外圍周匝篆紀年及糧料院名凡十二字以圍篆十二辰凡十二字中央篆正字上連印鈕令可轉旋以機穴定之用時月分對年中互建十

二月自寅至丑終始循環每改元即更鑄之云若此使
姦人無復措其巧矣少府監以奏詔三司詳定請如文
盛言

印式著令

又王文盛言舊例親王中書印各方二寸一分樞密宣
徽三司尚書省開封府方二寸節度使寸九分節度觀
察留後觀察使寸八分半防禦團練使轉運州縣印寸
八分凡印各上下七分皆濶寸六分雖各有差降而無

令式以紀其數詔從其言著於令

給奉使印

神宗熙寧四年詔中外奉使除文臣兩省武臣橫行已上不以職務緊慢餘官如使外國接送伴體量安撫制勘之類給奉使印餘給銅記以奉使朱記為名先是臣僚差使不以官序高下職務緊慢例給奉使印而今式節文非劇司者記故密院有請也九年八月令禮部鑄諸路提舉官印自是提舉官不帶奉使印以出

鑄三省貢舉印

元豐四年詔三省印銀銷金塗給事中印為門下外省之印舍人印為中書外省之印

六年別鑄禮部貢舉之印舊制貢院有印院廢印亦隨毀禮部遇鎖試則牒印廢事故也

遇事借印

禮部言政和令奉使官第二等以上給印餘給記差出者遇替移事故元借印記隨所在寄納本部歲終檢舉

拘收寄納州縣占留給借無以防之乃詔有司立法應州縣寄納禮部印記非奉朝旨不許擅行給借

鑄樞密印

文獻通考建炎三年鑄三省樞密院銀印

攷古記宋樞密院與中書對持文武二柄號為二府院在中書之北印有東院西院之文而共為一院但行東院印

夢溪筆談舊制中書樞密院三司使印並塗金近制三

省樞密院印用銀為之塗金餘皆鑄銅而已

却掃編樞密院承旨本吏人名太平興國以翰林楊守
一為之加都字後復用吏熙寧三年復以李綬充副都
承旨未幾又請鑄印詔止許印在院文字以樞密都承
旨印為文

鑄行在印

文獻通考紹興四年鑄行宮留守司印權戶部侍郎王
俟言文書以印記防姦偽錢穀尤為要切不可借用他

印今車駕巡幸凡常程文書皆留守司裁決以印記權
為立用如行在所度支用侍郎印金倉部通用金部印
留守司權本部侍郎用尚書印太府司農寺並用寺丞
印不惟目下交互異時必生姦弊請度支金倉部太府
司農寺各鑄印以行在所或巡幸某印為文事已發赴
禮部置櫃封鑰掌之遇巡幸關出行用庶無窒礙其他
部要切印記都省依此施行詔印文添行在所字

會子印

又孝宗隆興二年金部言初行會子權借戶部尚書印
覆印今行之已久恐致混淆宜專有印記俾郎官掌之
遂鑄太府寺專一檢察會子印二年復鑄尚書覆印會
子印

毀假借印

又乾道二年禮部請郡縣假借印記悉毀而更鑄馬端
臨云南渡之初有司印章多失尚方重鑄給之加行在
二字或冠年號以別新舊然欺偽猶未能革至紹熙初

禮部侍郎李巖言文書有印以示信防姦給毀悉經省部具有條制然州縣沿循或以縣佐而用東南將印以掾曹而用司寇舊章名既不正弊亦難防請令有司製州縣官合用印記舊印非所當用者毀之上從其請由是名實正而真偽別矣

印冠年號

又寧宗嘉定十四年山東效順鑄各州軍及京東安撫使馬步軍總管京東河北鎮撫節制大使印並冠以嘉

定二字

遼金玉寶

續文獻通考玉印太宗破晉北歸得於汴宮穆宗應歷二年詔用太宗舊寶御前寶金鑄文曰御前之寶印臣僚宣命詔書寶文曰書詔之寶書詔批答用之契丹寶受契丹冊儀符寶郎奉寶置御座東金印三晉帝所上

皇后太子寶

皇太后寶天顯二年應天皇后稱制羣臣上璽綬冊承

天皇太后儀符寶郎奉寶置太后座右皇后印文曰皇后教印皇太子寶重熙九年冊皇太子儀中書令授皇太子寶

臣下印

臣下印吏部印文曰吏部之印銀鑄以印文官制誥兵部印文曰兵部之印銀鑄印軍職制誥契丹樞密院契丹諸行軍部署漢人樞密院中書省漢人諸行宮都部署印並鑄文不過六字以上以銀硃為色南北王內外

百官印並銅鑄以黃丹為色諸稅務以赤石為色杓窠印窠鷺鳥之總名以為印鈕取疾速之義行軍詔賜將帥用之

金鑄各寶

續文獻通考熙宗皇統五年始鑄金御前之寶一書詔之寶一世宗大定十八年御史大夫完顏璋請製大金受命寶有司以秦璽文進上命以大金受命萬世之寶為文其制徑四寸八分厚一寸四分盤龍鈕高厚各四

寸六分有半禮部尚書張景仁少府監張僅言領工事
詔康光慶篆之二十三年三月鑄宣命之寶金玉各一
徑四寸二釐厚一寸四分鈕高一寸九分字深二分勅
有司議所當用奏今所收八寶及皇統五年造御前之
寶賜宋國書及常例目則用之書詔之寶賜高麗夏國
詔并頒詔則用之大定十八年造大金受命萬世之寶
奉勅再議今所鑄金寶宜以進呈為始一品及王公妃
用玉寶二品以下用今宣命之寶二十五年十二月命

範銅為禮信之寶凡賜方外禮物給信袋則用章宗明昌四年七月命以銀改鑄禮信之寶仍塗以金

太皇太后皇太后皇后太妃寶皆用金

太子寶

世宗大定二十四年幸上京鑄金寶以授皇太子有司定其文曰監國世宗命以守易監比親王印廣長各加一分龜鈕二十八年世宗不豫以皇太子攝政鑄攝政之寶貞祐三年以皇太子守緒控制樞密院詔以金鑄

撫軍之寶如世宗時制於啟稟時用之

給諸司印

天會六年始詔給諸司印其前所帶印記無間有無新命悉上送官敢匿者國有常憲至正隆元年以內外官印新舊名及階品大小不一有用遼宋舊印及契丹字者遂定制命禮部更鑄三師三公親王尚書令並金印方二寸重八十兩駝鈕一字王印方一寸七分半金鍍銀重銀重四十兩三字諸郡王印方一寸六分半金鍍銀重

三十五兩三字國公無印一品印方一寸六分半金鍍銀重三十五兩三字二品印方一寸六分金鍍銀重二十六兩東宮三師掌執與郡王同三品印方一寸五分半銅重二十四兩四品印方一寸五分銅重二十四兩^缺六品印一寸三分銅重十六兩七品印一寸二分銅重十六兩八品印一寸一分半銅重十四兩九品印一寸一分銅重十四兩凡朱記方一寸銅重十四兩天德二年行尚書省以其印小遂命議尚書省印小一等改鑄

大定二十四年二月行尚書省議事臺并左右三部印以從幸上京泰和元年安國軍節度使高有鄰言本州所掌印三曰安國軍節度使之印曰邢州觀察使印吏戶禮印用之曰邢州之印兵刑工案用之以名實不正乞改鑄宰臣奏謂節度使專行之事自當用節度使印觀察使亦如之其六曹提點所軍兵民訟則當用本州印著為定制上從之

元制寶璽

續文獻通考元至元元年七月定用御寶制凡宣命一
品二品用玉三品至五品用金其文曰皇帝行寶者即
位時所鑄惟用之詔誥別鑄宣命金寶行之六年製玉
璽大小十鈕文宗天歷二年開奎章閣作二璽一曰天
歷之寶一曰奎章閣寶命虞集篆文順帝作二小璽一
曰明仁殿寶一曰洪禧命楊瑀篆文洪禧璞純白而龜
鈕黑色至正元年詔刻宣文至正二寶

宣命之寶用
玉以玉筋篆

蒙古字印

一品衙門用三臺金印二品三品用兩臺銀印其餘大小衙門印雖大小不同皆用銅其印文皆用八思麻帝師所製蒙古字書

位號視印

鑑元宗室駙馬通稱諸王初制簡樸位號無稱惟視印章以為輕重後雖有國邑之名而印章之等如舊封一字王者金印獸鈕兩字王者金印螭鈕次有金印駝鈕金鍍銀印駝鈕龜鈕有止用銀印龜鈕等級不同如此

又同姓有無國邑而稱王者但稱宗王

明制寶璽

續文獻通考明寶璽凡十四寶之大者曰奉天之寶為
唐宋相傳惟祀天地用之凡詔若赦則用皇帝之寶立
封及賜勞則用行寶詔親王大臣用兵則用信寶冊上
尊號則用尊親之寶勅諭親王則用親親之寶祀山川
鬼神則用天子之寶封外國及賜勞則用天子行寶詔
外夷調兵則用天子信寶賜誥用誥命之寶賜勅用勅

命之寶以進御座則用御前之寶獎諭臣工則用廣運之寶勅諭來朝官員則用敬天勤民之寶

建文三年春正月辛酉朔凝命神寶成方一尺六寸九分帝親定其文曰天命明德表正萬方精一執中宇宙永昌先是帝在儲位夢神人致上帝命授以重寶元年使者還西方得青玉於雪山方踰二尺質理溫栗二年正月帝郊祀宿齋宮夕夢若有覩乃驚寤命玉人琢為大璽十二月工成名凝命神寶至是以告天地祖宗為

文宣示遐邇百官稱賀

后妃寶

續文獻通考皇后金冊金寶貴妃而下有冊無寶獨宣德元年以貴妃孫氏有容德請於皇太后製金寶賜之且命太師英國公張輔為正使少師吏部尚書蹇義為副使二公元臣也未幾而貴妃有子自是貴妃受寶遂成故事焉

諸司印信

明會典國初禮部設鑄印局又設儒士二員

後增二員

專寫

印上文字三年外補其大小衙門印記年久模糊者申知上司具奏鑄換新印其舊印仍繳印局看驗若印降未久捏奏煩擾雖已鑄換仍將申奏官治罪嘉靖後鑄造印記關防專以洪武正韻為主正韻不載方取許氏說文二書無攷者將六書等書參攷又洪治中奏准若衛所軍職將印當錢使用者帶俸差操

宗人府五軍都督府俱正一品銀印三臺方三寸四分

厚一寸

六部都察院并在外各都司俱正二品銀印二臺方三寸二分厚八分衍聖公張真人中都留守司俱正二品各布政司從二品銀印二臺方三寸一分厚七分

景泰三年

賜衍聖公
三臺銀印

順天應天二府尹俱正三品銀印方二寸九分厚六分五釐通政司大理寺太常寺詹事府及京衛并在外各按察司各衛俱正三品苑馬寺宣慰司俱從三品銅印

方二寸七分厚六分太僕寺光祿寺并在外各鹽運司俱從三品銅印方二寸六分厚五分五釐

鴻臚寺并在外各府俱正四品國子監并在外宣撫司俱從四品銅印方二寸五分厚五分

翰林院左右春坊尚寶司欽天監太醫院上林院監六部各司宗人府經歷司并在外各王府長史司各衛千戶所俱正五品司經局五府經歷司并在外招討司安撫司俱從五品銅印方二寸四分厚四分五釐在外各

州從五品銅印方二寸三分厚四分

都察院經歷司大理寺左右寺五城兵馬司大興宛平
上元江寧各京縣及僧錄司道錄司并在外中都留守
司經歷司斷事司各都司經歷司斷事司各衛百戶所
長官司及各王府審理所俱正六品光祿寺大官等署
并在外各布政司經歷司理問所俱從六品銅印方二
寸二分厚三分五釐

吏科等六科行人通政各經歷司工部營繕所太常寺

典簿廳上林苑監蕃育等署并在外各按察司經歷司
各縣俱正七品中書舍人順天應天府經歷司京衛經
歷司光祿寺典簿廳太僕寺詹事府各主簿廳并在外
各衛經歷司鹽運司經歷司苑馬寺主簿廳宣慰司經
歷司俱從七品銅印方二寸一分厚三分

戶部刑部都察院各照磨所兵部典牧所國子監繩愆
廳博士廳典簿廳鴻臚寺欽天監各主簿廳并在外各
布政司照磨所各府經歷司及各王府紀善典寶典膳

奉祀良醫工正各所宣撫司經歷以上正從八品俱銅
印方二寸厚二分五釐

刑部都察院各司獄司順天應天二府照磨所司獄司
鴻臚寺內儀署司賓署國子監典籍廳上林苑監典簿
廳內府寶鈔等各庫御馬倉艸倉會同館織染所文思
院皮作局顏料局鞍轡局寶源局軍器局都稅等司教
坊司并在外留守司司獄司各都司司獄司各按察司
照磨所司獄司各府照磨所司獄司及各王府長史司

典簿廳教授典儀所各府衛儒學稅課司陰陽學醫學僧綱司道紀司及各巡檢司以上正從九品俱銅印方一寸九分厚二分二釐

各州縣儒學倉庫驛遞閘壩批驗所抽分竹木局河泊所織染局稅課司陰陽學醫學僧道司俱未入流銅條記潤一寸三分長二寸五分厚二分一釐 以上俱直鈕九疊篆文

監察御史銅印直鈕有眼方一寸五分厚三分八疊篆

文

總制總督巡撫等項并鎮守及凡公差官銅關防直紐
潤一寸九分五釐長二寸九分厚三分九釐篆文

征西鎮朔平羗平蠻等將軍銀印虎紐方三寸三分厚
九分柳葉篆文

文淵閣銀印直紐方一寸七分厚六分玉箸篆文

宣德
年賜

惟進呈文字
等項用之

私印古制

攷古紀略古人私印質有金銀銅玉鈕有螭龜壇鼻獅
虎兔獸與官印無異又有子母印兩面印六面印乃官
印中所無子母者大印之中藏以小印多則三四少則
一二兩面者其厚一二分而無鈕上下刻文中空一竅
以緝組也六面者上下四週皆刻文字其制正方下及
傍側為五印上作方鈕彷彿如鼻成一小印也

印典卷二

欽定四庫全書

子部
印典卷三

詳校官中書臣賈鏞

貢外郎臣牛棣文覆勘

覆校官編修臣翁方綱

校對官中書臣吳俊

謄錄貢生臣宋大樽

欽定四庫全書

印典卷三

長洲朱象賢撰

賚予

印為示信之物所係非輕故古今封拜之所
及命令之所出非此莫憑今攷歷代帝王賜
授大略題為賚予以標鄭重

授印說吳

淮南子人間訓衛君朝吳吳王囚之欲流之於海魯君

曰吾欲免之而不能為奈何仲尼曰若欲免之請子貢行魯君召子貢授之將軍之印歛躬而行

受印約從

戰國策蘇秦見說趙王於華屋之下趙王大說封為武安君授相印

賜印擊楚

漢書彭越傳漢元年秋賜將軍印使下濟陰以擊楚

立王受印

吳王濞傳立濞於沛為吳王已拜受印高祖召濞相之
曰若狀有反相天下同姓一家慎無反

賜令尹印

陳勝傳勝使賜田臧楚令尹印使為上將田臧乃使諸
將李歸等守滎陽城自以精兵西迎秦軍於敖倉

懷思送印

東平王蒼傳永平十一年正月來朝月餘還國明帝懷
思乃遣使手詔國中傳曰日者問東平王處家何等最

樂王言為善最樂其言甚大令送列侯印十九枚諸子
年五歲已上能趨拜者皆令帶之

賜印擊吳

漢景帝賜汝南王以將軍印擊吳

賜璽賜印

南粵傳高皇帝賜臣佗璽以為南粵王賜其丞相銀印
陸賈傳天子憐百姓勞苦遣臣授君王印符通使君王
宜北面稱臣

賜匈奴璽

文獻通攷宣帝時始賜匈奴單于印璽與天子同又建武二十六年賜南匈奴黃金璽盤綢綬史漢光武賜莎車王賢西域都護印綬

賜烏孫印

烏孫傳漢都護韓宣奏烏孫大吏大祿大監賜金印紫綬又西域傳烏孫公主侍者馮嫫常持漢節為公主使行賞賜於城郭諸國敬信之號曰馮夫人為烏孫右大

將軍妻右大將軍與烏就屠相愛都護鄭吉使馮夫人乘錦車持節詔烏就屠為小昆彌賜印綬也

通經賜印

後漢書崔駰曾祖母師氏能通孝經百家之言王莽賜號儀成夫人金印紫綬文軒丹轂顯於新室之世

請賜印綬

東觀漢記諸王當歸國詔書選三署郎補王家長史除第五倫為淮陽王長史但輩除者多印綬皆假倫請於

王王賜之印綬

改授金璽

魏志天子使魏公位在諸侯王上改授金璽赤綬

印封倭王

文獻通考魏景初二年既平公孫氏倭女王遣大夫難
升米等詣郡求詣天子朝獻太守送詣都乃以金印紫
綬封為親魏倭王

賜刺史印

王隱晉書帝賜涼州刺史張駿金印文袍

賜學士印

翰林志晉開運中賜學士院書詔金印一

加章就謁

晉書虞潭母亦拜為武昌侯太夫人加金章紫綬潭立
養堂於家王導以下皆就拜謁

策賜蜜印

又山濤傳策賜司徒蜜印紫綬侍中貂蟬新沓伯蜜印

朱綬

卒贈金章

王導妻卒贈金章紫綬

詔假印綬

太始六年詔太傅壽光公鄭沖太保華陵公何曾皆假夫人庶子印綬食本秩三分之一皆如郡公侯比

佩假侯印

晉永安起居注太康四年有司奏鄴善國遣子元英入

侍以英為騎都尉佩假歸義侯印青紫綬各一具

賜印糾繩

唐元和十三年賜六軍辟仗使印辟仗使如方鎮之監軍無印及張奉國等得罪至是始賜印得糾繩軍政事任專達矣

賜外夷印

唐會要貞元十年詔賜南詔蠻異牟尋鑄印一用黃金銀為窠其文曰貞元冊南詔印

契丹傳至德寶應間朝獻天子惡其外附回鶻不復官
爵會昌二年回鶻破契丹酋屈戌始復入附拜雲麾將
軍右武衛將軍於是幽州節度使張仲武為易回鶻所
與舊印賜唐新印曰奉國契丹之印

曲賜金印

吳越世家唐莊宗入洛吳越王鏐復修職貢於唐并厚
獻以賂權要求金印玉冊上下其議於有司有司言故
事惟天子用玉冊王公皆用竹唐主曲從其請竟以玉

冊金印賜之

賜皇帝寶

文獻通考宋太宗以玉寶二鈕賜太祖之子德芳其文曰皇帝信寶至孫從式上之

賜諸王等印

淳化五年賜諸王印章至道元年鑄左右春坊印紹興三十二年鑄皇子鄧慶恭三王印

續文獻通考寶祐二年詔皇太子忠王授崇寧節度使

忠王之印景定三年以李壇效順賜金鍍銀印二

賜公主駙馬印

續文獻通考元世祖中統四年給公主符印至元四年賜駙馬不花銀印大德十年賜駙馬濮陽王金印

賜諸王印

至元四年封皇子忽哥赤為雲南王賜駙鈕金鍍銀印五年封諸王習怯吉為河南王賜駙鈕金印六年賜諸王與魯赤駙鈕金鍍銀印十四年改安西王傳銅印為

銀印二十一年封皇子為鎮南王賜塗金銀印二十二年賜皇子愛牙赤銀印二十五年賜雲南王塗金駝鈕印二十七年封皇孫為梁王賜金印

成宗大德三年封藥木忽而為定遠王賜金印八年封皇姪海山為懷寧王賜金印九年封孛羅為鎮寧王賜金印

武宗至大二年諸王禿滿進所藏太宗玉璽封禿滿為陽翟王賜金印又鑄金印賜句容郡王

賜給諸官印

元世祖中統九年詔扎魯忽赤乃太祖開創之始所置位在百司上其賜銀印三十一年

時成宗未改元

以范文虎監

後通惠河給二品銀印仁宗延祐元年陞司天臺為司天監秩正三品賜銀印二年詔遣宣撫司問民疾苦黜陟官吏並給銀印又改給各道廉訪司銀印四年陞蒙古國子監秩正三品賜銀印文宗天歷元年給殿中侍御史及冀寧路印凡內外百司印因兵而失者令中書如

品秩鑄給之二年立宮相都總管府秩正三品給銀印

賜玉押印

順帝至元七年詔左右丞相平章樞密知院御史大夫
得賜玉押字印餘官不與

賜方士印

元世祖徵方外士丘處機至京師為立其教賜金印章
漢張道陵之後世守其法元封其後為真人給以銀印
視三品文宗至順元年鑄黃金神仙符命印賜掌金真

教道士苗道一

賜皇后印

續文獻通考明高皇帝賜中宮皇后白玉印方一寸二分曰厚載之記

賜太子印

又高皇帝賜懿文太子白玉方印一寸二分曰大本堂
記文皇帝賜仁廟玉押曰人主中正仁廟即位時宣廟
方為皇太孫復舉以授之命印識章奏

賜大臣印記

明仁宗賜蹇義夏原吉楊士奇黃淮楊榮金幼孜印記
其文俱繩愆糾繆而蹇義又有蹇忠貞楊士奇又有楊
貞一之印宣宗賜蹇義曰忠厚寬弘夏原吉曰含弘貞
靜楊士奇曰清方貞一楊榮曰方直剛正胡濙曰清和
恭靖又文恭世家吳中曰和敏詳達各印記景帝賜胡
濙曰忠良惟篤王文曰忠誠匪懈衍聖公孔弘緒曰謹
禮崇德各印記世宗賜楊一清曰耆德忠正又繩愆糾

違張孚敬曰忠良貞一又繩愆弼違又別記永嘉張茂
恭桂萼曰忠誠靜慎又繩愆匡違李時曰忠敏安慎費
宏曰舊輔元臣夏言曰學博才優顧鼎臣曰經緯首選
翟鑾曰清謹學士又繩愆輔德方獻夫曰忠誠直諒嚴
嵩曰忠勤敏達仇鸞曰翔卿各印記其時郭勛亦有賜
印文字未詳萬歷間以少師張居正乞歸葬範銀為圖
書賜之俾馳傳密封言事文曰帝賚忠良嘉靖間顧鼎
臣居守用牙刻關防賜之

賜太監印記

明宣宗賜太監金英范弘各銀記又賜王御周瑾銀記
四曰忠肝義膽曰金貂貴客曰忠誠自勵曰心跡雙清
憲宗賜司禮覃昌牙記二曰忠誠不怠曰謙亨忠敬銀
記一曰才華明敏石記一曰補袞宣化世宗賜司禮張
佐銀記四曰集謀補德曰端忠誠慎曰輔忠曰勵忠司
禮麥福銀記一曰恭勤端慎蓋中貴得之不難此外不
能盡悉

賜方士印

明憲宗賜方士李孜省銀圖書二曰妙悟通玄曰忠貞
和直得密封言事又賜鄧常恩圖書一曰橐籥陰陽蕭
崇一圖書二曰至真玄妙曰丹霞歲月世宗賜真人邵
元節白玉印文曰闡教護國烏玉印文曰太和子又賜
真人陶仲文白玉印文曰凌虛子烏玉印文曰林隱銀
記曰秉一保國

流傳

人隨時往心思手澤後豈易見凡有遺存固
宜以異寶目之也至於璽印為用專以文字
較優他玩幸得留於後世安可忽而置之爰
稽記載用志流傳

奉上遺璽

文獻通考王莽篡位盜刻玉璽莽敗時帶璽綬避火於
漸臺商人杜吳殺莽取綬不知取璽公賓就見綬問所
在乃斬莽首并璽與王憲憲得無所送又自乘天子車

輦更始將李松入長安斬憲送璽詣宛上更始更始復奉赤眉赤眉立劉盆子建武三年盆子敗璽還光武

探井得璽

漢靈帝時董卓作亂天子北幸河上六璽不自隨掌璽者投於井中孫堅從桂陽入討董卓時已焚燒洛邑徙都長安堅軍於城南井中有五色氣軍人莫敢汲堅使人探井得漢傳國玉璽方四寸上鈕盤五螭螭上一角缺袁紹有僭盜意乃拘堅妻逼求之紹敗璽還漢

鋤園得印

後漢紀桓帝時沛國戴翼鋤園得黃金印

營廟得璽

魏志太和元年甄豫初營宗廟掘地得玉璽方一寸九分其文曰天子羨思慈親明帝為之改容

成都玉印

又咸熙元年鎮西將軍衛瓘上雍州兵於成都縣得碧玉印章一印文似成信字依周成王歸禾之義宣示百

官相國府

得印改年

吳志孫皓天冊元年吳郡言掘得有印長一寸廣三分
上刻有年月字於是改年大赦

發塚得印

嬰齊墓在番禺佗子也孫權發其塚得玉匣珠襦金印
三十六皇帝璽三龍劔三劔各刻有文曰純鈎干將莫
耶

璽出漢水

蜀志太傅許靖等上言先主曰前關羽圍於樊襄陽襄陽男子張嘉王休獻玉璽璽潛漢水伏於困泉暉景燭耀靈光徹天夫漢者高祖本所起定天下之國號也大王襲先帝軌迹興於漢中也今天子玉璽神光見璽出襄陽漢水之末明大王承其下流授與以天子位瑞命符應非人力所致

璽地得璽

晉紀建武元年江寧縣民虞迪墾地得白玉麟鈕璽一以獻文曰長壽萬年

刺史奉璽

玉璽譜雍州璽者晉雍州刺史郗恢表慕容永稱藩奉璽方六寸厚三寸上蟠螭為鼻台高四寸六分四邊龜文下有八字其文曰受天之命皇帝壽昌鳥篆隱起巧麗驚絕是慕容所制原其所由未詳厥始

得璽懷還

晉中興書戴施得璽陰懷還南王彪之議未詳傳國璽
造創之始然歷代以來及太始之初揖遜禪位以茲相
授故是傳國之守器也始得之宜慶賀

文獻通考傳國璽魏以禪晉趙王倫篡位使義王王威
就惠帝取之帝不與強奪之晉帝永嘉五年王彌入洛
陽執懷帝及傳國璽詣劉曜後為石勒所并璽復屬勒
刻一邊云天命石氏此題今不存勒為冉閔所滅此璽
屬閔閔敗璽存閔大將軍蔣幹晉鎮西將軍謝尚遣督

護何融至購賞得之以晉穆帝永和八年還江南晉元帝東渡歷數帝無玉璽北人皆云司馬家白板天子

淮水得璽

中興書義熙十二年左右衛兵陳陽於府事前淮水中得璽其文曰王者不隱其過則玉璽見璽亦璽也

遣送玉璽

晉書載記石季龍尅上邽遣主簿趙封送傳國玉璽太子玉璽各一於勒

石闕得璽

石勒別傳韓強在長城縣西山巖石闕中得玄璽一所
方四寸厚二寸石虎以為縣瑞

治第得璽

五代史蜀世家田令孜為監軍盜傳國璽而埋之於庭
永和二年尚食使歐陽柔治令孜故第穿地得之以獻
棄璽草間

文獻通考梁末侯景之敗也以傳國璽自隨使其侍中

兼平原太守趙思賢掌之曰若我死宜沉於江勿令江南吳兒復得之思賢自京口濟江遇盜從者棄之草間至廣陵以告郭元建元建取之以與辛術送之至鄴

汾水得璽

崔鴻十六國春秋前趙錄河瑞元年汾水中得玉璽文曰有新保之蓋王莽璽也獻者因增深海光三字淵以為已瑞大赦

龍門得璽

趙書劉曜於龍門河水中得一玉璽文曰克壽永昌曜
以為天錫劍璽齋九日而受

澗中得璽

前涼錄張寔元年蘭池趙嬰上言於青澗水中得一玉
璽鉗鈕光照水外文曰皇帝璽羣僚上賀寔曰何忽有
此言乃送之於京師

于闐玉印

北史祖瑩傳孝昌中廣平王第掘得古玉印勅瑩與李

琰之辨之瑩曰此于闐國玉印晉太康中所獻乃以墨塗觀之果然時稱其博物

槐里獲璽

北史魏文帝紀大統三年春二月槐里獲神璽大赦

璽投佛寺

唐六典侯景敗璽為將侯子監所盜走江東懼追兵至投諸佛寺為棲霞寺僧得之

右將軍印

右將軍會稽內史銅印斗鈕中空刻文兩面合漢丁為之者中央文朽處乃丁柄穿食小點晉永和八年王羲之自護軍右將軍代王述為會稽內史此其印也唐貞觀四年虞世南書孔子廟碑成刻石以拓本進呈太宗嘉愛以此印賜之

璽鸞之市

通鑑黃巢破長安魏州僧傳真得傳國璽以為常玉將鬻之市或識之曰此傳國璽也莊宗入魏傳真詣行臺

獻之

巧工司馬印

鶴岑隨筆臨淄縣人畊地得巧工司馬印攷諸史傳皆無此官惟趙德夫金石錄載偽趙建武元年西門豹殿基記有巧工司馬臣張由等監蓋此官獨偽趙有之印即此時物耳

咸陽得璽

文獻通考哲宗紹聖三年咸陽縣民段義斲地得古玉

印光照滿室四年上之詔禮部御史臺以下叅驗五年翰林承旨蔡京及講議玉璽官十三員奏按所獻玉璽色綠如藍溫潤而澤其文曰受命於天既壽永昌其背螭鈕五盤鈕間有小竅用以貫組又得玉螭一首白如膏其背亦螭鈕五盤鈕間亦有貫組小竅其面無文與璽大小相合篆文工作皆非近世所為臣等以歷代正史考之璽之文曰皇帝壽昌者晉璽也曰受命于天者後魏璽也有德者昌唐璽也惟德允昌石晉璽也則既

壽永昌者秦璽可知其玉乃藍田之色其篆與李斯小篆體合非漢以後所作明矣漢晉以來得寶鼎瑞物猶告廟改元肆眚上壽况傳國之器乎禮官言五月朔故事當大朝會宜就受寶依上尊號寶冊儀有司豫製沿寶法物并寶進入俟降出權於寶堂安奉前三日差官奏告天地宗廟社稷前一日帝齋於內殿翼日帝服通天冠御大慶殿降坐受寶羣臣上壽稱賀

上獻璽寶

文獻通考宋高宗開大元帥府謝克家以玉璽來上文

曰大宋受命之寶

上見之慟哭命汪伯彥司之

寧宗嘉定十四年十

一月京東河北節制司繳進北方大將撲鹿花所獻皇帝恭膺天命之寶并元符三年御府寶圖一冊

朱勝私印

宋史建炎元年朱勝非夜防城見南門外火光燭地掘之得銅印文曰朱勝私印火爍金金所畏也後拜相

壽亭侯印

容齋筆記荆門玉泉關將軍廟中有壽亭侯印一鈕其上大環徑四寸下連四環皆係於印上相傳紹興中洞庭漁者得之入于潭府以為關雲長封漢壽亭侯此其故物也故以歸之廟中南雄守黃允見臨川興聖院僧惠通印圖形為作記而復州寶相院又以建炎二年因伐木於山門大樹下土中深四尺餘得此印其環并背俱有文云漢建安二十年壽亭侯印今留於左藏庫邵州守黃沃叔啟慶元二年復買一鈕于郡人張氏其文

正同只欠五系環耳予以謂皆非真漢物且漢壽乃亭
名既以封雲長不應去漢字又其大比他漢印幾倍之
聞嘉興王仲言亦有其一侯印一而已安得有四雲長
以四年受封當即刻印不應在二十年尤非也是特後
人為之以奉廟祭其數必多今流落人間者尚如此也

校尉印

僧贊寧要言近獲龜鈕銅印僅寸其文校尉之印章作
三行篆前兩行皆二字第三行單章字細之令長稱副

前二行思軒先生曰此印與五字制甚合必漢物也

陰陽字印

江休復嘉祐襍志陶蔡河獲一玉印篆文不同成陰陽字

上傳國璽

續文獻通考遼自遥輦氏之世受印於回鶻至耶瀾可汗請印於唐武宗始賜奉國契丹印太祖神冊元年梁幽州刺史來歸詔賜印綬是時太祖受位遥輦十年矣

會同九年太宗伐晉末帝表上傳國寶按傳國璽秦始皇作唐更名承天寶後遂亡失晉亡歸遼自三國以來僭偽諸國摸擬私製歷代府庫所藏不一莫辨真偽聖宗開泰十年馳驛取石晉所上玉璽於中京興宗重熙七年以有傳國寶者為正統賦試進士天祚保大二年遼主延禧殺其子晉王敖盧斡遂走雲中遺玉璽于桑乾河

獲宋遼寶

又金太宗天會三年三月斡魯獻傳國寶時獲於遼者

玉寶四金寶二玉者通天萬歲之璽一受天明命惟德
乃昌之寶一皆方二寸嗣聖寶一又一御封未辨印文
金者御前之寶一書詔之寶一前寶金初用之獲於宋
者玉寶十五金寶七印一金塗銀寶五玉者受命寶一
咸陽所得三寸六分文曰受命於天既壽永昌相傳為
秦璽也白玉盤螭鈕傳國寶一螭鈕二玉並碧色鎮國
寶一文曰承天休延萬億永無極又受命寶一文曰受
命于天既壽永昌天子之寶一天子信寶一天子行寶

一皇帝之寶一皇帝信寶一皇帝行寶一皇帝恭膺天
命之寶二皆四寸八分螭鈕御書之寶二一龍鈕一螭
鈕宣和御筆之寶一螭鈕金者天下同文之寶一龍鈕
御前之寶二御書之寶一宣和殿寶一皇后之寶一皇
太子寶一龜鈕印者皇太子妃印龜鈕金塗銀者皇帝
欽崇國祀之寶一天下合同之寶一御前之寶一御前
錫賜之寶一書詔之寶一外有宋內府圖書之印一御
書三御筆一御畫一御書玉寶一天子萬年一天子萬

壽一龜龍上珍一河洛元瑞二雲漢之章一奎壁之文
一華國之瑞一大觀中秘一大觀寶篆一政和一宣和
一宣和御覽一宣和中秘一宣和殿制一宣和大寶一
宣和書寶二宣和畫寶一常樂未央一古文二封共三
十五面並玉封字一御畫一二面並瑪瑙政和御筆一
係水晶

出璽衛之

續文獻通考元至元十三年孟祺以故宋金玉寶及牌

印來上命太府監收之至三十年木華黎曾孫碩德已死而貧其妻出玉璽一齋之或以告御史中丞崔或或召秘書監丞楊桓辨其文曰受命於天既壽永昌為歷代傳國璽遂獻之丘瓊山曰此印得之故相之家楊桓考證以為秦璽按璽在漢為元后所擲角有微缺魏文帝刻其旁曰魏受漢傳國之璽今此印非秦所製者明甚疑即宋元符所得於咸陽民家者也

金關印

法書考金闕封完銅印輪鈕兩面皆有文如漢鏡銘

綉衣執法大夫印

盛熙明法書攷綉衣執法大夫銅印龜鈕得之淮陰字畫微漫大夫字如嶧山碑法

倉印

又古銅倉印甚薄令其長而二之隆其中一段比印身倍厚為鈕色如碧玉鈕左一淺竅不透按太倉令丞漢制主受郡國漕穀

楷字印

又南徐司馬之印銅鑄銳鈕桓溫嘗引表高為南徐司馬此即是也印制與漢不類蓋晉物也然文乃楷書順字或謂古者官印皆佩於身印作楷字須順文讀之所貴一見易讀若是反字惟可以印用但擾攘時印賜臣下貴順忘反非若篆文反順皆可讀也

劉勝印

又劉勝私印銅鑄瓦鈕鈕上作鈕鈕中穿一小印鈕上

見一珠下覆盆可轉不可出勝東漢人見杜密傳予得古銅章內亦有劉勝私印前行劉勝二字作白文次行私印二字作朱文龜鈕子母式與前不同

周惡夫印

初潭集人有獲玉印文曰周惡夫印遺劉原父原曰漢條侯印尚存於今耶或疑之原曰古惡亞二字通用史記盧綰之孫他人封亞谷侯而漢書作惡谷是矣聞者服其博學

二十字印

鶴岑隨筆余見古銅印一枚鼻鈕約方三分作白文曰
伊寬私記宜身至前迫事毋閒願君自發封完印信凡
二十字青綠溫潤疑是六朝物

得印名字

又至正間陸友仁得古銅印一枚文曰陸定之印即名
其子而字之曰仲安

濬河得印

野航漫錄都憲河間張汝器弘治間奉勅開濬漕河於揚州揚子橋得舊印四枚皆盤螭鈕其文一壽亭侯印一鎮江府御前駐劄都統制印一鄂州管內觀察使印一都巡檢使之印進于朝惟壽亭侯知為關公餘不知為何時物時程篁墩過淮陰張以是質之程曰史稱韓世忠嘗為鎮江府御前駐劄都統制岳武穆嘗為管內觀察使此二印蓋宋物都巡檢亦宋官主捕賊以守臣兼領今不注其職守所在莫知為誰也

名同古印

徐元懋云予家藏古銅印有一龜鈕者其文曰子實古且拙意其為漢物也嘉定一友潘士英字子實以此贈之吾蘇劉尚書纓號鉄柯杜御史啟偶得一古印亦曰鉄柯因以贈之往往有相同者

泥印

周減齋云金陵一老友以泥印贈予云其祖曾給事海忠介公故物也其質以黃泥為之略煨以火文曰掌風

化之官

壽亭侯印

宋漫堂云大內有古銅印方一寸連環鈕四刻壽亭侯印朱文四字翡翠燦然傍有痕似嵌寶玉取去者先文康嘗取一紙寶玩之此印流傳不一詳容齋四筆

龍神印

又今戊申歲京師正陽門挑濬御河得玉印如升篆文人不能識禮部出榜訪問並原印印其後數十日無辨

之者少宰孫北海家居聞之曰此元順帝祈雨時所刻龍神印也各門俱有之蓋雨後即埋地下耳因取一書送禮部上刻印文注釋甚詳一時歎為博物

謀克印

柳邊紀畧丙寅歲遼東外沙兒虎舊城掘地得銅章傳送禮部大二寸餘篆合重渾謀克印六字背左楷書如面文右刻大同二年少府監造八字按大同遼世宗年號而謀克則世傳金爵也今觀斯印則金末建國號為

遼屬時已有斯爵而後特廣之耳

印典卷三